

國朝書獻類徵初編卷二百八十七目錄

將帥二十七

馬良柱

王無黨

丁士傑

武進陞

宗室恆祿

愛隆阿

國柱

王玉廷

馬負書

李勳

額僧格

新柱

本進忠

瑚爾起

豐安

烏爾登

巴祿

1

1

染

四

五

1

100

0000-0000-0000-0000

•

為

五、

[illegible]

1998

10-20-2010 10:20:20 AM

1

[illegible]

國朝耆獻類徵初編卷二百八十七

通奉大夫前署江西巡撫江西布政使司布政使湘陰李桓輯
將帥二十七

馬良柱

馬良柱原籍甘肅張掖人後入四川成都籍康熙五十四年由行
伍拔補把總五十九年從征吐魯番有功遷甯夏西協中衛千總
六十年從征額魯特打仗受傷雍正二年正月協理將軍阿爾那
檄赴插漢麥里干地方討賊獲庫勒宰僧人等八月隨安西鎮總
兵孫繼宗攻勦羅卜藏丹津抵花海子招安三十三家台吉復於
哈馬兒打布罕噶斯地方生擒丹津渾台吉三年授藍翎侍衛

賜銀一百兩四年擢三等侍衛旋授四川提標遊擊 賞貂皮數珠等件六年 詔帶兵駐劄西藏 賞銀四百兩七年因兵丁滋事部議降一級調用 命在四川巡撫提督處聽候調遣八年六月瞻對土司不法提督黃廷桂檄良柱進剿八月分路進兵賊築石碉守之險峻不可拔良柱率兵仰攻賊槍殪所乘馬易他馬進再殪之乃步行督戰直擣賊穴石如雨傷面搏賊益力奪其礮火之連燒擦馬擦牙各寨殲賊無算側冷邦等處各番目俱降 命交部議敘十三年二月復授松潘鎮標左營遊擊五月調漳臘營遊擊乾隆六年遷越巂營參將八年擢夔州協副將十年四月復率師剿瞻對連破直達松多等處賊寨奪碉樓七十餘座斬獲甚

眾得 旨嘉獎六月進攻下密左山梁獲賊首噶籠丹坪十一年
克下密等處一百餘寨擒賊目塔巴四交兵渡了魯河環攻三晝
夜焚燬賊巢賊首姜錯太死於火捷 聞 命交部從優議敘十
二年二月大金川逆酋莎羅奔滋事攻圍革什咱土司並劫殺明
正土司所屬之魯密章谷巡撫紀山調良柱威茂協副將駐兵防
禦三月逆酋糾合小金川土司澤旺擾沃日各寨都司馬光祖等
往援賊大至被圍於熱籠地方良柱率輕騎馳至與賊戰於巴納
山奮勇擊殺賊眾披靡逆酋退保各卡守禦甚堅官兵四面攻擊
克石卡二百二十三馬光祖等出應之番眾潰散圍解招降賊澤
旺並納還所侵沃日三寨 諭曰威茂協副將馬良柱前在瞻對

軍營曾著勞績今又隨征金川頗能奮勇出力著補授重慶鎮總兵六月復孫克宗官寨七月攻稗斗寨賊伏兵松林良柱擊卻之進兵江卡連戰皆捷克大小寨碉一百餘座分路追剿賊震懾陸續就撫者二十餘寨進擊丹噶山復大克之良柱以撒籠等寨近在丹噶山右必須攻撫收爲我用因分兵進取焚撒籠等七寨噶固等寨先後降賊守石達大碉良柱冒雨進攻數十戰賊乘夜撲營良柱設伏待之痛加剿殺賊兵殲焉九月馬邦地方業經就撫之夷目思錯因總兵許應虎撫馭失宜復行滋擾圍應虎於的交良柱帶兵援之擊退賊眾十月賊入戎布寨良柱攻之未下十一月賊復犯馬邦副將張興被圍良柱欲移戎布之兵往援屢請於

總督張廣泗不許張興之師遂陷十三年正月賊復侵噶固守兵
叛從賊奪參將郎建業卡倫七處良柱督兵往援奮勇力戰賊不
稍卻時大雪二十餘日良柱軍乏糧糲食鎧弩力遂不支張廣泗
檄令退師良柱倉卒移營致軍裝礮位多有遺失廣泗劾之命
解京治罪經軍機大臣訊明乏糧失礮緣由上免其拘禁命
在香山營教演雲梯親臨觀之復以舞鞭稱旨賞大緞荷
囊諭曰馬良柱雖經獲罪朕看其人材與庸懦無能者有間在
綠營將弁中猶爲強幹之員伊獲罪情節尚可原宥且在川年久
於番地情形頗爲熟悉著仍發往金川軍營交經略大學士訥親
總督張廣泗酌量以副將參將等官委用俾效力贖罪十一月補

泰甯協副將十四年正月大學士傅恆來督師檄良柱攻昔嶺克之酋懼乞降傅恆遣良柱親往諭之以十餘騎入賊營宣揚德意番眾驚服二月大金川土司莎羅奔降番地悉平 諭曰副將馬良柱前在總兵任內進剿金川已有克捷因張廣泗忌其成功按兵不給更加參劾經軍機大臣等奉旨審明復令赴軍營效力馬良柱素著威名番眾畏懼此番隨征頗爲出力經經略大學士忠勇公傅恆奏明馬良柱著補授建昌鎮總兵賞戴花翎以示獎勵七月丁母憂十五年 命來京引見 諭曰原任總兵馬良柱服雖未滿業已逾年著畱京教習雲梯營兵丁俟有總兵缺出令其署理先是良柱在建昌總兵任內曾請入籍四川至是 允行十

六年服闋授四川松潘鎮總兵時雜谷土司蒼旺不法偕提督岳鍾琪討平之尋以年老乞休二十七年卒子應詔官直隸河間協副將孫瑜官至江南提督

右 國史館本傳

王無黨

王無黨直隸萬全人康熙五十一年武進士授藍翎侍衛五十九年授廣西梧州協中軍都司雍正元年遷雲南開化鎮標右營遊擊六年調中營七年遷東州營參將九年協勦烏蒙餘孽議敘功加二等十年四月遷廣西梧州協副將十一月援勦貴州台拱九股叛苗由清江左路與中右兩路兵會勦南工交上烏覺交烏羅番招蓮花屯一帶賊巢事竣還營十二年擢左江鎮總兵十三年四月九股苗復叛無黨馳抵古州分兵赴八寨督勦又清理八弓邛水一帶十二月經略張廣泗檄無黨分攻台拱之大台雄克之及交上等三十餘寨擒逆首巴利等尋會收牛皮大箐敘功紀錄

一次乾隆元年五月署貴州提督隨廣泗剿撫上下九股各處餘孽二年二月實授貴州提督閏九月疏陳黔省急務四事一黔地瘠產米少下游可運楚米上游並無水道積貯最要米穀外請並收蕎麥再動帑廣常平倉貯貴糶賤糶以濟民食一城垣殘缺者宜修全無者宜築責成地方官迅辦保固一墩臺塘房請立限修整文武離任時人於交代一川販掠賣人口有夥黨拒捕者請嚴定地方文武失察故縱處分下部議行三年同廣泗奏定番州屬有姑盧寨苗恃險強橫臣等量遣官兵撲滅其地在都勻定番界苗狎環處從未見兵威與其兵少而稽遲不若兵多而迅速酌撥漢土官兵三千餘分路燬逆寨搜深箐擒首惡老排旬餘軍務全

竣諭曰姑盧頑苗雖屬小醜然不速行撲滅恐爲附近居民之累張廣泗王無黨辦理妥協可嘉著交部議敘尋議加一級四年陞見賞孔雀翎六年四月調湖廣提督時貴州黑崗頑苗滋事大學士伯鄂爾泰以無黨在黔年久熟悉苗情奏明畱辦軍務十二月赴新任八年諭曰朕聞湖廣營伍甚屬廢弛提督總理通省軍務操練修整是其專責王無黨到任已及二年全無整理亦未將營伍情形奏聞殊屬不合著交部察議尋議革職得旨從寬畱任九年疏言荆門營守備於康熙二十八年移駐沔陽新隄查緝江湖竊盜十二年又增撥水師把總一員近來宵小潛蹤無需守備防範且距本營水程七百五十里陸路八百餘里鞭長莫及

及請撤回其千總仍帶原兵駐防報 聞十二年疏言湖南候補
千總之武舉缺少人多請將年力才技漸就衰退者報部註冊部
議 從之十三年二月以徇底提標兵乘民人失火拾衣物部議
請革職 命調取來京引見十四年補湖南沅州協副將十七年
遷雲南楚姚鎮總兵十八年署提督十九年擢鑾儀衛鑾儀使二
十年授福建漳州鎮總兵二十四年遷浙江提督二十七年以目
疾解任回籍調理二十八年卒 賜祭葬如例諡壯愨

右 國史館本傳

丁士傑

丁士傑順天大興人康熙五十二年一甲二名武進士授二等侍衛旋遷直隸獨石口參將洊擢正定協副將雍正二年升貴州大定鎮總兵四年擢福建提督五年緣事革職乾隆元年起授直隸大名協副將四年升河南河北鎮總兵五年正月奏言豫省劫案獨多臣備訪其故緣前督臣田文鏡遇有劫截勒令諱匿不報以致盜賊肆猖雖竊取糧食升斗莫不明火執仗形同劫盜以冀漏網年來各撫臣嚴禁諱匿無論竊劫俱令通報故積案纍纍所當於巨鎮大市嚴立保甲密加巡防以銷盜於未萌將來凡有應行事件當按起咨商撫臣和衷共濟使地方營伍均有裨益得旨

所見頗是與撫臣和衷實力行之朕將徐觀其效二月奏言豫省兵丁技藝生疎蓋由各營中有從前出師一等兵丁四十名遇有把總外委缺例應拔補但伊等本係車騎營步兵弓馬未嫻而儘數補用則眾兵悉無冀望未免怠不知奮嗣後應請於各營中挑選材藝俱優者與出師一等兵丁參酌撥補庶幾人知策勵上可其奏下部議行五月奏整頓營伍教習弓馬緝捕奸匪借給米穀各事宜諭以實力奉行以期永遠無弊七月調浙江處州鎮總兵六年三月奏言處州地僻民貧各兵技藝未精亦以謀食故分其手足未便驟加督責應漸次整飭以期有成上是之七月調廣西左江鎮總兵七年奏鎮屬土司閒有不法生事者一由該